

KPM perkenal bidang pengajian berkaitan EV di Kolej Vokasional mulai 2026

Ridauddin Daud

Oktober 11, 2023 11:05 MYT

KUALA LUMPUR: Kementerian Pendidikan Malaysia (KPM) akan memperkenalkan bidang pengajian berkaitan industri kenderaan elektrik (EV).

Timbalan Menterinya, Lim Hui Ying berkata Kolej Vokasional (KV) Pengerang Johor akan memulakan pengajian EV iaitu Teknologi Automotif Hibrid dan Kenderaan Elektrik (EV) pada tahun 2026.

Menurutnya, usaha itu adalah sebagai menyokong Dasar Automotif Nasional untuk memacu penggunaan EV di Malaysia

"Perancangan prabina sedang dilakukan bagi memastikan kursus yang bakal ditawarkan ini dapat disiapkan mengikut garis masa yang telah ditetapkan.

"Manakala elemen Teknologi Automotif Hibrid dan EV serta Teknologi Robotik diterapkan dalam kurikulum di 53 buah KV yang menawarkan program Teknologi Automotif yang pada ketika ini memang berupaya untuk meningkatkan pengetahuan murid terhadap teknologi terkini.

"Untuk makluman Ahli Yang Berhormat, terdapat 2 KV yang sedang beroperasi di Parlimen Wangsa Maju iaitu KV Setapak dan KV ERT, Setapak.

"KV Setapak menawarkan kursus yang berkaitan teknologi automotif yang menerapkan elemen EV," katanya di Dewan Rakyat pada Rabu.

Hui Ying berkata demikian menjawab pertanyaan Zahir Hassan (PH - Wangsa Maju) yang ingin tahu perancangan KPM untuk menambah bilangan kolej vokasional yang akan menawarkan kursus kemahiran dalam industri EV.

Dalam pada itu, beliau berkata, KPM juga komited memastikan graduan TVET KPM relevan dengan pekerjaan masa hadapan.

Jelasnya, kementerian akan memastikan kandungan kurikulum bagi program diploma yang ditawarkan di KV diberi nilai tambah teknologi terkini selaras dengan perkembangan industri 4.0.

"Sebagai contoh, smart farming dan internet of things (IoT) dalam bidang pertanian yang diintegrasikan melalui latihan amali bagi program pertanian.

"Ia dilaksanakan di lima buah kolej vokasional (KV) Pertanian KPM yang menawarkan program pertanian seperti KV Teluk Intan, Perak, KV Chenor, Pahang, KV Pasir Putih, Kelantan, KV Dato' Lela Maharaja, Negeri Sembilan dan KV Lahad Datu, Sabah," ujarnya.